

西南紀事

西南紀事卷九

餘姚邵廷采念魯撰 邵武徐 餘小勿校刊

李成棟 李元膺 杜永利

李成棟字廷貞山西□□人高傑故將也少從傑爲羣盜
乙酉以鎮徐將軍守徐州許定國殺傑成棟舉徐州降

大清旣爲將累戰勝有功故趙王由棧與黃蜚起太湖成棟擒
蜚走趙王授松江總兵從定入閩與巡撫佟養甲自漳州
入潮惠潛兵陷廣州殺唐王聿錫丁亥正月攻肇慶分兵
下南韶遣楊文甫張月取高廉雷閩可義取瓊州廣東十

郡皆破桂王奔廣西成棟尋陷梧州使杜永和誘殺丁魁楚於岑溪鹵其貨遂攻平樂圍桂林瞿式耜焦璉死守會陳子壯張家玉陳邦彥起兵圍廣州成棟解桂林東還擊殺子壯等式耜亦進復平梧高廉雷

大清詔問失地狀成棟懼戊子春金聲桓以江西反布政使公安袁彭年說成棟曰公爲將畢智竭勞南定閩廣功無與比佟養甲以遼東勲舊晉秩總督位居公上當受節制燕京本有疑公心聲桓又反江西將益忌漢人今大江左右延頸朱氏瞿式耜守桂林不滅李綱何騰蛟帥湖南亞於

宗澤將相大臣皆有中興之氣公孤軍陷南中進不爲新
朝所容退犯天下之名義況去年自春徂秋所擊滅粵東
忠義之士以什百計粵人怨公深於骨髓日夜痛念思乘
間爲父兄復仇公持此區區爲北朝之忠身死無名爲天
下笑何不以此時歸命南寧故主得公如得一國眾正傾
心怨仇消解合見兵羣盜可得精卒十萬與騰蛟分道出
江楚以憐江南經略西北中興之功可翹足待身名兩榮
顧不美乎智者舉事不可後人養甲不聽一壯士力耳公
其思之成棟念家屬百口在松江不忍其愛妾知其意進

曰我敢獨富貴乎請先死公前以成公志遂劓成棟前成棟驚哭曰我乃不及一婦人與彭年登樓去梯謀時高傑兄子進庫守贛州爲聲桓所攻急請救廣東養甲趣成棟出兵布政司移饒八萬彭年故不發由是遷延粵尙多長髮夏五月旱羣盜滿山成棟陰結其豪傑語養甲曰今出城數十步皆賊安能遠行計惟急改名號以安人心耳遂出示直書永曆二年養甲愕然無可奈何兩司官諷養甲以印授成棟成棟下令文武將吏軍民解辯是日首自加網賊官購及優人服色草草成儀遂以廣東十郡歸王請

大駕幸肇慶表至南寧中外相賀封成棟惠國公養甲襲平伯進兵工二部尙書養甲懼禍悉解所部兵授成棟於是江西道通聲桓使者始至桂王以江廣反正告於宗廟是月命吏部郎中吳貞毓宣諭廣東貞毓留佐軍前請遷都廣州瞿式耜拜疏言任將之道不從中制本朝文網太盛動以內臣監視文臣督師墮戰士心今聲桓成棟皆以全軍歸命天下聳動知明室尙有其主投足左袒攸繫匪細宜有以尊崇而寵褒之願陛下將兩省新附之地捐之此兩人一切軍功爵賞文武署置以及刻期出戰咸決於

外朝廷不問方可責其成功若大駕旣東不請則主權不尊請則事機坐失臣以爲乘輿無入廣州駐肇慶便王從之六月成棟使羅成耀以黃金千白金十萬綵紵舟楫具迎王於南寧王至肇慶成棟負弩矢郊迎百里外從騎萬匹拜成棟爲翊明大將軍以其子元胤爲錦衣都指揮掌絲綸房事擢袁彭年左都御史封其裨將杜永和閻可義郝尙久羅成耀黃應杰楊大福張大瀛等七人皆爲伯十月成棟出師北舉取南安進攻贛州時譚太久圍南昌金聲桓不出戰江西諸郡復反爲北而成棟方至與高進庫

遇不利退壁南康縣十一月佟養甲遣間使密表燕京爲
成棟所獲伏誅順治六年己丑正月南昌陷何騰蛟亦死
湘潭二月成棟敗於信豐身斷後披甲策馬渡河沈死兵
部尙書楊調鼎監軍道姚文生俱死亂軍報至贈成棟寧
夏王謚武烈成棟上唇微缺號李訶子本以功高恥爲養
甲下決計歸命奉舊主恭順待文武舊臣皆有禮迨再度
嶺無功倉卒陣沒朝野惋惜敗後杜永和代守廣州又一
年而敗王復走南寧

李元膺本姓賈字源白陝西榆林人李成棟養子也爲人

修潔有忠孝性居

大清軍中嘗漢衣僧帽佟養甲承制授以官固辭朝夕侍膳從容乘間數以義勸其父成棟歸桂王元胤及袁彭年實使之桂王至肇慶拜錦衣侍衛甚見寵信西朝士大夫皆樂與交時彭年負時望掌臺綱與劉湘客丁時魁金堡蒙正法等相善持論抗激專尊主權抑倖授中外號五虎而稱元胤爲護法章馱元胤雖恂雅長斷略數定變事養甲謀覺王命元胤縛而磔之成棟敗沒加車騎將軍封南陽伯領禁兵李赤心之潰於茶陵也由道州入廣西陳邦傳欲

倚其兵力其奪廣東堵屑錫主之元屑詰屑錫曰吾輩在北朝時公不來復廣東今乃來爭廣東耶屑錫不能答元屑遣楊大福扼封川赤心西趨潯州大福邀其後隊五千人而東焚掠懷集四會遠近震駭元屑召大福入肇慶縊殺之亂始定順治七年庚寅正月三日

大清班志富破韶州遣許爾顯江定國以舟師襲清遠西斷肇慶降於是桂王發肇慶奔梧州留元屑守肇成耀走高州將爲亂奉詔計斬之

大清兵追與馬吉翔出屯三水其弟建捷以守廣州功封安肅

伯五月元膺自肇慶朝行在追訟金堡等冤還出救廣州
廣州陷建捷突圍至肇慶守將宋裕昆叛元膺建捷出走
後四日桂林亦陷王發梧州夜走南寧陳邦傳乘亂殺從
官掠鹵簿元膺兄弟追及伏地痛哭哀動左右孫可望遣
將賀九義入南寧殺大學士嚴起恆元膺忿甚請出靈山
收高廉雷兵迎駕入瓊州就杜永和會提督李明忠敗於
疍峒

大清兵已下高廉雷郭登第等皆降陳邦傳復叛南寧震恐元
膺進退失據辛卯九月至欽州之防城爲土兵王勝堂所

執見耿繼茂不屈左右擬下笑曰鼎鑊不懼何有於擬令
作書招永和笑曰杜將軍繕兵窮海差有丈夫氣乃招之
耶繼茂義之使其故人往說君昔未受國恩耶元胤慟曰
我昔不過帥府養子今爵五等司禁旅狼狽被執惟一死
報國豫讓不言之乎吾父俟於九原久矣故人曰成棟果
君父耶曰岐陽黔寧俱以養子自奮子毋多言與建捷俱
遇害部將李用朝亦從死投屍海中

杜永和字□□□□□人李成棟部將也善機略嫻守

戰威名亞於成棟成棟旣沒桂王命兵部侍郎劉遠生如

廣州勞師以永和代爲總督守廣州閩可義守南雄時李元膺入典宿衛而永和等統重兵分鎮廣東瞿式耜以督輔留守桂林雖新喪大將備禦尙固乘輿前後安處肇慶者二年順治六年己丑六月永和聞燕中有變拜疏出師北舉不果可義尋卒以羅成耀代明年庚寅正月尙可喜耿繼茂陷南雄成耀望風遁遂失韶州可喜遣其將許爾顯以舟師襲據清遠而自與繼茂陸行會廣州永和與張月李建捷隨方拒守爾顯載大礮夜進順流入石門之水南師驚擾朱戰艦數十粵中進永和等爲侯命元膺馬吉

翔陳邦傳東救廣州邦傳至三水不進

大清兵乏食就鄉聚和買民多不從鹿步下有龍眼崗五百餘家開岩門放礮爾顯攻圍盡屠之鄉聚懼出應羅遂爲持久計總兵鄭文光偵敵被執海盜梁標相以戰艦二百降可喜大習水軍永和懼水路失守遣使乞師於碣石帥蘇利利已發兵開標相叛復召還嶺東道李士璉總兵黃應杰郝尙久以潮惠降廣城東援遂絕五月廣州兵擊斬靖南遊擊張大奎安定伯馬寶率郭登第等襲清遠不克大清兵拔三水百道攻廣城張月出戰大軍不利退獲其戰艦

三百餘艘資械無算永和蓬朶自運礮石置白蠟城上每副將予五百金綵緞表裏拜奉月等以金杯犀玉故將卒效命一年之間有戰必勝永和白晳整暇於五層樓上張宴設樂無虛日

大清兩王遙望跣足曰不謂吾曹遂死此地十一月

大清兵疫饑決命一戰月等又戰敗之燒其鐵甲兩王方對坐礮碎其案驚怖欲死夜

大清兵復集攻西門城壞數丈月等用大礮殺千人大軍退南軍戰勝下城就飯外人乘空而登城中遂潰死者六千餘

人追至南門逼海墻溺死尤眾永和月吳文獻殷之榮張道瀛舟數百艘奔瓊州總兵范承恩降可喜繼茂屠廣州馬寶馬吉翔攻清遠垂下聞廣州破乃退廣城三面臨水成棟復築兩翼傅江爲礮臺水遶之地勢旣險而永和等力戰自二月至於十一月凡攻圍二百七十餘日始破順治八年辛卯九月耿繼茂下瓊州永和等眾尙數萬以全軍降其年七月西安將軍李定國克桂林楚粵皆復桂王年號可喜懼亟趣茂班師繼茂入廣州張月前降

大清守高州至是復翻城迎定國定國敗月不知所終

論曰李成棟將略在金聲桓上然方度大庾北嚮一戰輒
顯豈非衰運難扶歟抑胸無全局以至此也元膺武人而
識大義君子尤惜之杜永和固守廣州使尙耿智勇俱竭
雖不能死賢乎以城降者矣

西南紀事卷九

西南紀事卷十

餘姚邵廷采念魯撰 邵武徐 幹小勿校刊

李定國

李定國字壹純陝西延安人初從張獻忠爲盜冒張氏獻忠養子四孫可望年長知書數位第一定國以能次之劉文秀艾奇能又次之所至破陣屠城而定國驍勇超逸更稱萬人敵獻忠僭號成都定國爲僞安西將軍既聽汪兆齡謀盡殺蜀人令定國等四將軍分道刈殺以所殺多報功最

大清兵斬獻忠西充定國等帥潰眾南陷重慶殺如故明年正月入遵義始不殺略貴州趨雲南乃去偽號稱明將軍始獻忠死其黨有悔禍之意艾奇能首數汪兆齡罪殺之重慶定國每靜念有明天下自秦州煽亂怙惡不撫決裂至是吾輩膽義素不後人何惜此筋力不以恢廓疆宇歸復明朝劉文秀亦以爲然及入楚雄得楊畏知畏知爲陳說忠義指明邪正時奇能已死定國文秀深悅服獨可望陰賊外唯唯內倣獻忠所爲亾何可望稱國主設六卿用干支紀年定國心非之或齟齬可望縛定國棒之八十抱其

頸泣曰吾以大義辱弟幸同心力無慮疑定國頓首謝請
擒沙定洲報德由是憾可望其年十月及文秀進討俱革
命斬定洲己丑四月桂王封可望爲遼王賜定國名如靖
可望拒命定國因辭賜名可望殺畏知遂遷桂王於安龍
定國滋恨然未敢入朝壬辰四月

大清定南王孔有德逼貴州可望承制命定國文秀經略楚蜀
以馮雙禮副定國步騎八萬出武岡辰沅破大軍有德退
守桂林定國乃分道自將出新寧使雙禮出祁陽合趨全
州復遣西勝營張勝鐵騎右營郭有名率精兵由西延大

坤疾走嚴關扼桂林要道令曰敵至傳火毋下關須大軍
會戰雙禮帥前軍都督高承恩鐵騎前營王會武安營陳
國能天威營高文貴坐營靳統武合兵四萬先進至譯湖
猝遇大兵萬餘逆戰斬驍將李四乘勝遂薄全州定國帥
右軍都督王之邦金吾營劉之講左協營吳之聖武英營
廖魚驟騎北營卜宣合兵六萬繼進聞譯湖捷傳令全州
傳城者毋急攻懼其奔逸并力於桂林全州已下定國至
令急過無入雙禮出城合進有德遣數萬眾奔救全州張
勝已營嚴關距大軍十里日且暮大軍引去旦復至勝傳

礮大軍蓐食而前戰於關下象債歸定國斬御象者諸軍
奮進象突陣大軍退天大雷雨橫尸被野追及大榕江又
告捷有德急入桂林大軍三日而至守陴者皆潰援梯畢
登是爲七月四日定國下令屯城上有德奔入府悵然無
語久之曰已矣其妻曰無慮吾不死屬女僕以一子出曰
苟得脫度爲沙彌遂與其妾共縊有德舉火自刎投火中
獲其子廷訓及陳邦傳陳師禹先是有德使提督線國安
略南甯右翼總兵全節防柳州左翼總兵馬雄守梧州重
鎮皆出桂林守兵援全州三戰皆盡定國行疾是以速克

胡一清趙應選馬寶曹志建等自南寧敗後尙留粵西屯聚山谷聞定國至相率來歸民間亦多嘯聚以應於是定國進復柳州斬守道金漢蕙東下平樂將攻梧州雄告急廣東國安節及文武道府州縣印官四十六人皆逃於梧尙可喜遣副將強世爵以舟師大礮奔救定國猝至大軍退遂克梧州雄等東走封川尋走廣州可喜遣副將蓋一鵬赴肇慶迎護其眾令世爵扼封川江便宜戰守是時劉文秀入蜀無功而定國克復廣西乘勝東下嶺南震動而定國顧北取永州強世爵囚及馬雄三鎮復取梧州緣國

安全節帥所部西行是月

大清兵下瓊州杜永和張月凱猶數萬以全軍降

大清兩王得專意廣西九月孫可望使白文選攻拔辰州定國
進至衡州長沙岳州從風潰馬寶曹志建亦復連州獲守
將茅生蕙送定國斬軍前十一月三日

大清敬謹親王兵號十萬至衡州定國遇河上甫接少卻親王
恃勇舍大軍而追定國設奇擣中堅過險伏發交鎗起害
親王軍遂潰定國全師歸武岡可望忌定國召赴沅州議
事將殺之定國覺引還廣西可望敗於寶慶湖南復陷癸

已三月定國帥馬寶等自梧州破開建德慶抵肇慶連營據北山別將下四會廣寧前距三水於是岑溪宋國相出掠羅定東安西寧海盜戰艦二百由新會順德諸港入九江口清遠山寇並發聲言導定國渡河走從化襲廣州水陸大震潮州郝尙久隙於郭虎班志富尙可喜以劉伯祿代之調尙久水師尙久怒不受代舉兵稱新泰侯馳檄南韶漳惠

大清遭哈哈木會耿繼茂攻之是月廿六日定國圍肇慶泄其濠三面急攻用布囊盛土爲牆置木柵挨牌藏鳥鎗以拒

內兵陰穿地道城中大懼許爾顯壅濠城中以待緇城奪梯設死守月餘不克

大清兩主謀李定國或從木縣頭度河得合尙久會城危且無北歸路矣乃令繼茂發鐵騎守三水東南鑿側門出奪地道兵多死不能出者焚死地道中定國退軍五里

大清兵潛出西南二門奪龍頂岡營用鑣鉤長鎗獲兵數百人狗於城下於是定國解圍還而郝尙久將攻惠州爲黃應燕所扼不出碣石蘇利以舟師助繼茂吳六奇堅守程鄉饒平待

大清兵秋八月潮州破尙久父子死定國東行失利由可望貳
心無後援而頓兵堅城也桂王自至安龍受制可望大學
士吳貞毓太監張福祿等言定國忠勇雖出盜賊實與可
望異趨爲國之心如青天白日因手敕密使封定國爲晉
王使引兵入衛詞旨哀愴定國叩頭出血曰臣定國一日
未死寧令陛下久蒙幽辱幸稍忍待之臣兄事可望有年
竇負友必不負君致書貞毓曰粵中未定進退維艱幾事
須密責在老先生事泄貞毓等竟遇害可望以是滋恨定
國甲午春遣馮雙禮賀九儀以騎兵七千步萬餘從古泥

懷遠追定國於柳州定國奔賓南東略雷廉雙禮等遂擊桂林尙可喜慮可鑒與定國實合謀陰益兵犄角以圖兩粵懼甚疏請敕湖南經略洪承疇分發滿軍由衡桂入樂昌下廣州漢軍由永州入桂林與粵西兵合趨南寧斷定國歸路粵東兵從高州進夾攻之

大清不聽益兵而遣秘書學士郎廷佐移繼茂鎮福建可喜愈懼疏留繼茂其鎮

大清兩王以定國在廣疲於奔命五月定國發廉州故將張月以高州歸

大清嶺西道周公軾學道錢朝鼎等皆死秋海北道陳武度海
攻拔臨高昌化黎岐蠢動水陸響應僭崖路斷瓊州守將
高進庫告急於廣州定國進復陽春陽江恩平前鋒抵肇
慶欲大舉發郴桂兵出韶州江楚界上兵入海嶺約閩海
國姓攻惠潮可喜畏定國不敢戰又慮兵分則弱謂繼茂
且以劬縣餌之於是

大清督李率泰檄總兵郭虎副將杜豹守高明可喜遣甲喇章
京田雲龍守新會三日滇兵圍新會可喜令右翼總兵吳
進功助雲龍守定國以舟師扼江門築礮臺於陸遏援兵

兩王親赴江門爭水陸並進滇兵少卻阿達哈哈番劉秉
功等得入新會二十日定國復至高明掘地道急攻城壞
二十餘丈將陷可喜來救望見滇軍盛遽退定國自帥步
騎萬餘追之還精銳五百人急驟可喜遇伏不利失總兵
武君禧遊擊王天才等十六人可喜退晦克高明擒郭虎
斬杜豹遂合圍新會分兵出三洲金利甯灣羅屈諸口距
廣州百里軍聲大振新會饑盡食木根皮及犬馬浮萍百
道並攻吳進功等守益堅朱成功遣黃梧道海應定國十

二月

大清靖南將軍朱馬喇蘇章京東邦帥滿漢軍會尙可喜耿繼茂於三水同趨岡城十日至三洲南軍接戰不利失副將梁大勲十四日至新會定國嚴陣城北驅戰象列礮兩山峽口以勅兵屯峽左山將乘高馳下可喜遣尙之智盛登科先擊左山兵左山兵潰峽口兵望陣動連得成田雲龍栗養志統步兵合戰象驚礮還走滇兵亂八固山蒙古固山烏金超哈藩下騎兵兩翼縱擊滇兵大崩戈甲棄載道死者無算亾十三象北軍追奔三五里定國有馬三千將戰遣廝養先牽去從者二百騎步兵四萬得脫者半定國

盡撤肇慶高明高州馬步兵戰象皆入鬱林州選斷養得
萬餘人自新興南走高州東邦追之不及總兵孫際昌叛
奔土司何美璜寨定國使都督吳三省總兵楊成王三才
以步騎千餘象一隻追取之與東邦等遇於興業復敗獲
象以去東邦留尙之智駐興業自與敖拜來塔等追及定
國後軍後軍敗老營妻子衝散蒙古滿洲兵追定國及於
橫州南軍亡象二馬二百八十定國燒絕浮橋由賓州夜
走南寧

大清軍以朱養恩鎮南寧久地連交趾內接溪峒不可卒拔乃

選際昌及中書楊琳諸將白長王之臣等三十人皆降由是廣東高雷廉三府肇慶羅定屬三州一十八縣廣西橫鬱林二州北流興業容岑溪四縣復歸

大清瓊州羣盜皆降定國力屈不能復出西南之業衰矣乙未正月定國將朝桂王可望懼使白文選以兵逼王移駕貴州宮中皆哭文選感動以定國本無他意還報定國至遂奉王西行文選棄可望來歸至雲南盟劉文秀及王尙禮王自奇等曰同輔朱氏背之者死詔以雲南爲滇都命定國爲輔民大將軍總滇黔楚蜀兵知行在大政定國與沐

夫波劉文秀同心明室人心稍定丙申秋可望犯闕上下
震恐時定國新敗文秀所將留滇兵不滿萬行朝百事草
創諸鎮自楚粵至者皆聚於黔定國文秀以眾寡不敵疑
懼詔遣文選宣諭可望可望拘文選奪其兵馬進忠馬惟
興馬寶以同姓相密雅善文選因說可望使文選將兵西
進至交水距三岔二十里輕騎奔定國軍具言人心內向
可一戰定也可望奪氣時進忠以病留安順馮雙禮在貴
州可望乃遣寶與張勝襲滇都自以重兵壓交水日夜索
戰令定國不得還救惟興遣親信夜告定國令速戰是日

引兵薄惟興軍惟興內應其眾大崩可望奔湖南降

大清定國還至渾水塘寶來歸斬張勝雙禮舉貴州降定國以黔蜀辰沅並可望故鎮悉調赴雲南核功罪定國伉直小心臣節進奉極豐不以威凌士類然計慮擘畫什不及可望記室金惟新滇人也官少宰信任而馬吉翔工彌縫復入閣舊人失職多怨望於是王自奇等俱叛誅戮頻行內外惕息丁酉春

大清兵三道南進會文秀卒定國東西獨禦遂不支冬十月貴州破命定國假黃鉞文選爲副出師恢復貴州定國及雙

禮統大軍扼盤江河據雞公背文選及將軍竇民望等別將四萬人守七星關進屯生界距遵義百里牽制吳三桂兵三桂自平越兼程還遵義十一月三桂帥總兵沈應時馬寧等復發遵義文選自生界退保七星關十二月二日三桂自水西以烈超天生橋入烏撒越險扼七星關大道文選懼棄關走可渡橋尋焚橋走霑益泗城州土官岑繼祿導北軍入安龍定國由盤江還戰累敗遂回滇都奉桂王奔永昌文選留守玉龍關戊戌正月三日

大清兵入滇都四日王至永昌詔勤王定國還黃鉞待罪請削

秩不許閏月

大清吳三桂趙布太陷大理至玉龍關文選帥張光翠陳勝等與戰而敗由沙木和走石甸鎮康定國退至潞江慮行在體重難行遣護衛將軍靳統武黔國公沐天波奉蹕先出騰越而身留磨盤山當敵磨盤陡立阻潞江內箐深屈曲僅容單馬定國築柵數道左右設伏大營屯山後四十里檄攬坡炊食饗伏令毋見煙火

大清兵行緩持重伏兵五日夜山深食寒銳氣半銷二十一日吳三桂趙布太渡潞江前驅遇伏大戰竟日中書盧桂生

自伏中逃歸告爲先備分精甲禦伏而正兵由大路平行
南軍擾亂泰安伯竇民望都督王璽皆戰死定國憤發麾
後軍齊進殊死戰

大清死傷甚眾卻三十里而定國度前軍旣潰奸人有輸敵情
恐孤軍不支遂整旅出騰越追扈行在行在已出銅壁關
入緬緬人請敕銅壁關毋納漢兵遣兵守關斬統武奔告
定國定國慮緬情叵測遽入恐激變乃使高允臣馳報爲
緬所殺始未戰時諸營妻子輜重散逸軍士四出求妻子
未得猝集定國令定朔右將軍吳三省斷後收兵自率大

軍取道孟定白文選自木邦來會定國以文選不與磨盤之戰見而尤之文選不悅及議所向定國曰我若入緬緬苦供餽必見拒擊之禍結盍擇險要邊土休士馬相犄角緬外憚吾二人君在內可無憂且得陰連諸土司覘雲南動靜文選曰並在外則內危我入衛上王任外事竟異議別移錫薄所至縱兵大掠定國乃從孟定過耿馬至孟緬屯數月潰兵相續來歸軍聲稍振咸陽侯祁三昇孟津伯魏勇自雲南得出從駐耿馬三省來護大營妻子將赴定國遇懷仁侯吳子聖將軍楊武脅之同降吳三桂三省佯

諾出不意走潞江遂棄大營妻子以兵奔定國移營孟連
三昇不欲從矯定國令轉龍川虎喇誘魏勇連兵道遇三
省并誘之行定國召文選故鎮張國用趙得勝等皆以所
部來歸軍勢益振元江土官那崙與降將朱養恩許名臣
高應鳳等謀建義事泄三桂帥兵圍元江崙告急定國方
赴援會孟良酋長患定國在孟連勢肘腋乃糾合眾夷爲
梗定國還戰平孟良元江已陷崙焚死定國度諸土司疑
懼不敢前且休甲孟良令夷目耕田輸糧如縣例廣國公
賀九義自南寧間道來奔三桂令其妻血誓招之九義受

書不告定國定國見勢敗下多出降益相疑杖殺金惟新等復飲九義杖殺之九義裨將何起龍率部眾至蔓谷河入滇降定國使總兵唐堯宗駐磨乃招納降附堯宗違令殺商客取貨轉售孟良獲倍價有志士投孟良者誘收麾下皆引去無入孟良故滇中事機絕不聞而孟良去緬都阿瓦懸遠亦不知緬瓦事定國惟日夕練兵覬恢復而已庚子九月文選抵雍會江使使諭緬皆不返乃謀攻阿瓦阿瓦二城大江出其中緬王都新城在江左舊城名赭磴安置行在在江右聞文選兵不戢請行在旨諭文選毋進

且云老皇帝避難我國極盡主賓禮乃反蹂我地謂我國無人耶文選怒渡江向新城敗緬兵緬給許移新城用大礮擊文選營文選不支遁走孟良定國驚曰不用吾言果致緬怨今在內者危若之何文選慚九月八日定國與文選合兵入緬發孟良定國由西道文選由東道張國用趙得勝仍以所部兵從文選期會洞鄔初魏勇吳三省連兵轉虎喇始覺三昇意然三昇猶未有降志聞定國處賀九儀而勇又病死遂收勇兵約三省同出降三省復陽許十月以三桂令移駐騰越三省出三昇不意返兵由孟定趨

孟良詣定國迨次磨乃定國去孟良已一月唐堯宗不奉定國調遂巡謀降

大清三省覺而收殺之流孟定耿馬間爲游徼而定國等士馬
入緬者糧乏道死亾定國先至見江干多船議分兵渡江
與桂王於赭磴身攻圍新城統武謀曰兵分力單不如
金力搗緬都緬都破上自出乃俱望新城進敗緬人瑞羊
岳緬都三面阻江一通陸文選還後并鑿之引水爲湖繞
三堤置水城其上定國從南鳴喇江爲浮橋以濟馳諭緬
王送行在講好緬復云汝老皇帝避難吾國受吾供億前

番一野王子來反將仇報汝主在我家肯然今送出更何
如欲攻城亦唯汝汝等水土不宜堅守二三年無所畏定
國度緬人不聽乃進屯洞怕距城八十里文選距百十里
屯象腿緬人於木城之外更立木城以兵守之明日復前
又立木城逼定國營乃大出兵搏戰前隊皆象定國不利
趣文選兵中間橫擊皆殊死戰緬人大敗時五月炎暑我
兵渴甚不能窮追緬復入守木城定國獲緬目善待之諭
送車駕終不聽復謀渡江向緒磴前洞卽船皆藏匿使人
赴上流馬得狼井角造船緬人焚船定國又進擊敗之四

面縛其糧道凡三月緬人煮鹽以食要我軍他糧乃出車
駕定國不得已唯唯軍吏自相攻殺多出降使人守江橋
亦焚橋走定國計竭七月十六日緬人殺我從官四十二
人沐天波死之定國以十六舟渡江擊緬不勝覆其五舟
八月十八日及文選還洞郎凡行營例定國文選各前行
三日時文選軍在後張國用趙得勝等竊語此地煙瘴已
傷多人今再深入氣候更熱非盡死不止寧出雲南無作
緬鬼部兵聞語皆喜夜束載定二將披甲入卧帳請文選
行文選驚起皆曰大事知不成更深入瘴地空死無名殿

下必隨晉王是續賀九儀也文選曰爾等今欲何往國用
曰以此人馬出雲南何向不重曰若皇上何國用曰心力
已盡可見天意遂發抱挾文選上馬文選不能禁夜退走
七十里比明定國覺曰羣殿下欲何往耶命子嗣興尾文
選與同行止定國亦緩隨之行五日至黑門限國用得勝
斷後議曰晉世子急躍不去我我軍行疲爲累不若就此
山勢與決戰令彼還方可前進遂阻山齊發矢石嗣興怒
麾兵奔而登定國已至亟呼嗣興與罷戰乃大勦曰白文選
強欲攻緬微壞大事故皇上不還我竭心勤勤皇上微

忍舍去冀彼初念可回故令爾隨行今與我戰是其志決
矣當年同起兄弟今惟伊在何必與彼相攻邀得文選兵
四十餘人悉令放還仍帥所部獨進洞郎文選行三日遇
吳三省自孟定來營馬盡死軍皆步將入緬文選見之流
涕曰我負皇上與晉殿下矣將軍能帥兵至此使我有太
山之助乎三省度文選眾皆有背意乃揚言雲南降者皆
怨恨不得所人心思明故我輩咸願步來到此文選部兵
見三省並有踴躍狀聞此言各鼓舞國用得勝亦遂轉慮
不復言適雲南會徽人汪公福攜海上鄭成功約師表來

文選遂屯錫薄復遣蘇總兵出木邦會定國進兵留待月
餘報書未至三桂統大兵急追文選度不敵間道西走孟
養三省在焉三桂抵木邦獲降人得文選情知定國先入
洞鄔文選不降必疾走阿瓦機不可失乃速進兵抵錫薄
文選果行遂分遣八都督馬寧馬寶馬惟興鄒三昇高啟
隆沈應時李貴等尾文選令無戰附書招之三桂自望阿
瓦進發傳檄緬王使送行在出城時緬爲晉藩所做適

大清兵至遂將桂王及宮眷送三桂軍前復城守

大清兵既得桂王亦不攻緬卽班師還雲南文選過孟養見馬

寧等追之不置就山立營欲與戰部下皆挺刃思奮文選
竟怯不敢發詞追將有所善馬寶乃陰與寶語寶持三桂
書單騎入其軍文選遂降十二月十八日由孟密入雲南
明年五月初燕京封承恩公定國在洞郎方譚再舉已知
三桂入緬行在蒙塵憤懣欲絕曰勢既不敵追無能爲乃
由孟良傷雲南邊伺王動靜四月至猛蜡遣官入車里送
禮惜兵復雲南救駕車里暹羅俱使人請入計用兵事宜
尊禮甚殷會定國人馬病死日甚乃齋戒作表告天叙平
生洎反正輔明皆本至誠何皇穹不祐至有今日若明祚

嬪侍起居自鐵門限與定國辭決每使人勸妃盡節辭曰
有君上在妾不敢死非貪生也及文選降桂王入滇遂自
縊文選遣官葬之嗚呼文選之爲妃謀則得矣鄧凱也是
錄載入緬後婦女死義有姓氏者九人王妃二人餘姓氏
未詳者不下百人爲之撫卷憑弔若定國之志久而不渝
豈問所從來哉

劉文秀

劉文秀字□□□□□人始從張獻忠爲盜以材猛稱
獻忠僭號成都文秀爲僞撫南將軍獻忠大殺蜀人文秀

一路殺男九千九百六十餘萬女八千八百餘萬獻忠死
孫可望等奔至重慶阻江不得渡文秀素善泅水行如履
平地可頃刻數十里沒而往奪南岸船渡遂殺曾英已渡
烏江亦如之進陷貴州入雲南時文秀與李定國艾奇能
俱有悔禍意私約扶明室而奇能遽死兩人制於可望不
遂順治四年丁亥八月可望進逼永昌黔國公沐天波遣
子忠類入營計事文秀謂可望曰沐世子來猶沐國公也
請以國公禮禮世子比遣以二十騎送之忠類方謁天波
有兩人歷階而上忠類愕然告其父曰此卽撫南劉將軍

及王將軍某也遂挾天波還雲南可望僭稱國主文秀意不服楊畏知每對軍中言先帝被難生民遭毒至於流涕軍中感動文秀與定國尤心釋其言益改所爲己丑四月可望使畏知入朝始奉明朔王賜文秀名若琦曾爲公以可望不受平遼亦不敢受庚寅可望始封秦王遣文秀及王自奇取黎州嘉定定川西以文秀守之辛卯王遷安龍

大清兵陷四川文秀先還雲南夏四月詔封文秀爲南康王帥張先璧白文選等進慨四川文秀善恤士卒而蜀人饑渴王師多響應於是文秀復叙州文選復重慶嘉定成都皆

下

大清平西王吳三桂定西將軍墨勒根瑕退走保寧南師乘勝
追躡惟恐失敵討北將軍王復臣諫曰師驕矣被方致死
以驕兵當死敵能無失乎諸將欲進至保寧復臣又曰毋
圍城圍城則師分而弱不聽先璧軍其西南先璧號張黑
神軍容耀日然未經大敵三桂登城望之曰獨是營可襲
出精騎犯其壘果驚潰轉戰而南值復臣營復臣營爲潰
軍所擾又阻水遂大崩復臣被圍數重曰大丈夫不生擒
名王豈可爲敵所辱手斬數人自刎文秀徹圍而退可望

四庫全書
九
令文秀失謀損大將當誅以復城功量罷職諸將散守蜀
隘或調征楚文秀蕭然歸雲南從者百餘人而已然可望
實忌文秀用此奪其兵由是復棄兩川譏者恨焉其年李
定國破

大清兵於廣西湖南害孔有德及敬謹親王可望尤忌之將殺
定國定國走廣西追之弗及可望謀逆王密詔定國入衛
事泄可望盡殺朝臣與謀者念文秀冲退冀爲已用張其
威望與抗定國起招討大都督甲午四月文秀入貴州可
望禡旗稱爵相侑期以恢復中原五月七日文秀單騎出

按沅靖諸營周觀險隘勞恤軍吏十日而畢七月擇吉出師由平越道屯於天柱進攻常德不利還鎮雲南而定國亦連敗於新會興業橫州南保南寧可望自是殊無經略之志以定國旣敗不足忌謀逆益急然頗疑文秀意趣未敢卽發文秀深自引匿行朝及西藩行營無一字往來遺問以故上下莫測乙未正月定國文秀迎王於安龍幸雲南將至文秀陽與可望部將王尙禮王自奇賀九儀等議城守身從數騎馳會定國曰吾輩將以秦王爲董卓但恐誅卓之後又有曹操耳遂揮涕定國指天誓曰文秀乃決

西南紀事
於是車駕入會城文秀進封蜀王與定國同輔政明年計
可望戰於交水可望遣走貴州文秀追及之遂奔長沙時
大愿旣去忠義同心方議安集漢黔經略川楚而文秀遽
病丁酉夏四月二十四日文秀薨

西南紀事卷十

西南紀事卷十一

餘姚邵廷采念魯撰 邵武徐 翰小勿校刊

金聲桓

金聲桓字□□左良玉故將也世爲遼陽人以軍功至總兵良玉與張獻忠戰鄖襄間及與羣賊戰聲桓嘗斬帥摧堅乙酉從良玉討馬士英發武昌趨九江良玉死子夢庚及黃得功黃蜚等戰於紫沙洲南陵屬敗全軍迎降英王使率諸將朝燕聲桓不欲往請取江西以獻許之會王體忠爲滿兵所敗追急奔聲桓聲桓乃聲言滿漢馬步二十

萬且至江西速降者免屠巡撫曠昭解印走官民亾散六月四日聲桓平舸入南昌諸生數十人逐舟庭謁聲桓方中青紗金縷洒線蝴蝶披風且笑且摠引諸生起喃喃謙讓從官盡掩口笑旣入城與體忠分營而居誅鋤豪暴漸假便宜署官屬時體忠兵強而戢少抄掠人心附之其裨將王德仁本闖營選鋒所當無堅陣生而願二毛軍中號王雜毛聲桓忌王氏未有以發會薙髮令下三日莫應因曰此王兵梗也旦請體忠計事方交揖使驍將鐵嶺白朝佐斬之王營大譁燒德勝章江門格鬪三日諸金率精兵

巷戰且戰且招降而聲桓先已使客說昭德仁許以王營
全軍屬之由是遂并體忠軍軍益強聲桓自以單軍傳檄
取十三府七十二州縣不費清朝斗糒寸兵功高意旦夕
封王公侯已而僅授總兵提督江西大沮氣塞唐王立福
建稱隆武命大學士楊廷麟萬元吉取江西扼於聲桓退
保贛州永寧王亦敗死撫州明年八月唐王陷於汀州冬
贛州陷廷麟元吉皆沒聲桓屢戰勝滋驕多殺人士爲威
福病未薙及誣告通明宦閩者輒論殺沒家產江西重足
而立乃役夫萬人營府第窮極麗壯北來有司益多挫之

德仁亦望總兵提督不得快快使丹容宗超一開天寶洞致物怪檄置雷役丁甲所居故宜壽王府深八九重燕私或服明製冠衣後堂張飲奏郭子儀韓世忠故事由此兩家怨詞稍稍聞於外初萬元吉以從楊嗣昌西征識聲桓於左營贛州未破時嘗遣使達聲桓說使南歸不報使去聲桓急捕萬僕菁華械庭下夜深解其縛與善飲食勞苦問耆師起居未明而縱之菁華後泄其語而諸官聞脫歸者餽知金玉怨望各緣所知私覲兩人始圖免禍後乃意立功輒時時微言楊萬未死唐王故在也既益習則間露

其關防割付言唐王屢手詔許公歸明者封江西亦嘗達
一二乎以何聲桓生祠成請冠服像式爲華陽巾羽衣觀
者鮮舌客因益極口詭聲桓言明復夫聚先封侯待收京
且分天下而王之聲桓習聞此言喜與元吉語相應及巡
撫李鳳翔死代者章于天遇諸將益倨日就求珍寶一日
置宴敷重席各取銀管吸煙已不及諸將割炙蹄又獨與
文官飲食自聲桓以下皆坐旃外酒半酣顧曰王德仁汝
欲反耶德仁歸大愧其從騎聲桓亦失色俛首轉鞭還帥
府七月德仁提兵如建昌于天移票追襲三十萬德仁大

怒椎案曰我王流賊也明崇禎皇帝爲我逼死汝不知耶
聲若獅吼目睛迸出宗超一弟子黎士彥輕帽喜事因聲
桓客黃人龍自薦獨我知隆武帝所在聲桓曰富貴與爾
其之亾何士彥夜袖侯伯兩印入及玉剛卯一文鏐精忠
報國曰此上所私賜聲桓喜時佩腕間迨德仁歸以示之
且授伯印曰吾聞烏金王爲何騰蛟所敗使趙旗鼓往視
待歸而定及歸言烏金小失利今且大破明兵於寶慶會
胡以寧死諸客相欬狐疑以故按不發以寧者奇智士向
客左良玉有口斷泄王氏演韓郭諸戲及請生祠像服皆

其本謀因以劫致兩人其從兄澹亦有密慮懷素情嘗爲
諸將圖畫不用巡按董成學覺金王反意有端屢揚言將
奏聞而索德仁歌兒德仁度與歌兒則內狀益泄固不與
戊子正月望日于天率家丁如瑞州捕掠富家有滿兵數
十騎先發或以告德仁恐其伏瑞州須撫按議定脫有尺
一詔公等且見擒德仁益急晦萬壽節先三日壬戌習儀
於上藍寺德仁伏軍衷甲往上甬道努喙睨聲桓曰如何
聲桓搖首夜德仁歸勒全營癸亥五鼓謁聲桓聲桓不出
德仁向父事聲桓語其子翁死耳侯亦死非侯亦死何不

決聲桓心薄侯乃曰爲公可遂反旦七門不開絞殺董成
學盡捕逐司道府縣官射奔者纓笠山積追縛章于天江
中先是丁亥桂王立於肇慶稱永曆而越播武岡柳象江
南罕有知者故聲桓與客謀議第以隆武爲言至是兵起
自稱豫國公號德仁建武侯馳檄大書隆武四年襄戴匡
復明室沿江諸郡響應

大清恭順王孔有德智順王尙可喜懷順王耿仲明所謂烏金
王也三王前鋒時已至全州謀攻桂林聞南昌之變乃還
武昌何騰蛟遂出湖南復衡永然聲桓無大略德仁徒勇

臨事不斷從人望迎前閣臣姜曰廣於希湖里資其門生
故吏四出號召內任諸金以書記陳方吳尊周爲撫按小
大僚署皆其私親客而諸客首言明事者並不及德仁追
憐故小妻黃用其兄天雷爲錦衣兵部侍郎客旣失望各
自稱隆武故官收眾山湖別爲一軍聲桓基王氏日盛德
仁則患諸客賣官招兵分權利兩家所爲客或轉譁噉而
曰廣亦惡客非制科妄以進士官自居也出示詆之逐客
之意遂決自陳大生等皆囊頭箝脛梃掠跛躄出國門旬
日間公侯義客分三旅而所遣迎唐王駕下時遇等趙趙

道中實不知所在或曰邵武或曰安遠並支吾無驗兩人亦覺其詐然事已舉微聞南來人言唐王已死桂王繼立卽爲唐王禪詔進諸官秩文移更稱永曆二年藏表佛經中遣使問道如廣西阻李成棟未得前聲桓意終疑又謀求益王子立爲世子監國諸事唐王而嘗爲魯王官者因亦各謀迎魯王縉紳有識駭其舉動矜乖徐避去東路義旅督師侍郎揭重熙詹事傅鼎銓到城一日並引兵還獨曰廣在城與聲桓德仁調筴兵食二月庚午德仁西略九江胡澹詣軍門說曰君侯擁精騎數十萬指麾顧盼所在

莫不結釐刺網以待義師此下九江奚啻拉朽若能乘破竹之形以清兵旗號服色順流而下揚言章撫院請救者江南必開門納君其將吏文武皆可立擒遂更徽幟播年號祭告陵寢騰檄山東中原當聞風響應夫舉大事必規全利不可爭尺寸惟熟思之德仁破九江珍其擄獲自部護歸以澹謀告聲桓坐客皆曰此實上策不者西取武漢連衡鄖襄與湖南何氏鼎足相援則中策也萬一不然攻城衝邑所過不留重爲流賊是爲下策若待粵西帥六師方行北伐持久失時勁兵猝至嬰城坐困斯無策矣宋奎

光勸從上策黃人龍曰高氏在贛明公獨不聞寧王之事乎乃議伐贛州慮德仁專制會城使偕行三月丙辰出師騎步舳艫旌旗輜重水陸相屬三日不絕先齎冊印封高進庫諭以利害進庫初無意鬪及見冊印大怒曰金皇帝耶乃敢侯我且桂王安在遂勒兵出戰聲桓使白朝佐衝之約曰戰酣來助朝佐前破建昌得金銀五十萬聲桓出師索之曰久盡矣及戰追奔數十里徑抵城下進庫困迫朝佐亦倦視大軍尙距二十里怒曰此爲彼五十萬欲置我死地也卽收軍歸南昌棄官爲僧進庫得復入城守金

王全軍相持七十餘日會城空虛

大清遣固山額真譚太討聲桓召三王班師四月壬戌譚太破
九江南昌聞之城內外皆走雖斬之不能禁五月辛未游
騎至石頭口始議築城大軍東路走南昌而偏師先從麥
源青嵐諸道搜西山而出未下營已血刃數十里陳方吳
尊周束手無策兵民獨倚宋奎光黃天雷守癸酉聲桓兄
成功約降奎光殺以徇夜徹城外屋不及者焚之火光燭
天王營裨將貢鼇以其軍叛斬關徑出報至贛州聲桓大
懼徐引軍還高進庫出兵追之頗得其後騎是月李成棟

以廣東自歸迎桂王於梧州聲桓表始達因封聲桓爲豫國公兼兵部尙書遣太僕卿黃尙賓宣諭江西己卯聲桓前軍至生米遇

大清兵十餘騎放掠爭利蹕冷口橋橋斷溺死十餘人驚傳軍敗後舟遽揚帆退癸未金王大軍接戰於北沙

大清兵退獲大礮三罩以丹帛鼓吹昇置德勝門郭中聲桓意驕遽勒兵入城郭天才力爭不可弗聽天才自屯西岸六月二日德仁悉精兵攻

大清壘甫列陣

大清兵橫出塞之大敗於七里街

大清兵素忌德仁名雖勝猶時時夜驚曰王維毛來也然城中自是竟不出譚太築土城東自王家渡屬灌城西自雞籠山及生米驅掠男女荷畚塹濠深廣餘二丈伐木發屋緣濠樹排柵發塚斲棺及未葬者悉舉之取其匡郭牆壁爲濠底又爲浮橋章江廣袤七里起文家坊至楊子洲三橋上直磯中當洄洑下當湍駛處皆沒水置石下椿爲基度及沙面且丈餘丈餘之上更累木石平水面後緝船慢板加土重棧楯爲橋會旱水涸故就時人謂自古未有橋章

江者知天道助

大清也周會城數十里田禾山木廬墓四望俱盡先至之兵私載擄獲連舸下男女斥賣悲號動天浮屍蔽江天爲黃霾自鄱湖下至儀揚舳舻人貨豔湛千餘里於是河淮南北驍悍亡命靡不忻健願死江西屬饗譚太營蒲子塘築臺於永和門東二里登望城中獨留惠民門濠側數十丈縱人出入亦藉以俘掠吳尊周及諸將多託請援去郭天才在西岸五戰三勝見城中兵不出亦撤營去所遣買米運硝黃芻橐先後數百艘俱被遮擊無一還者六月廿一日

大清兵西燒生米明日燒市汶七月六日燒黃土墩八月十日

挾松湖水陸道絕而德仁方娶武都司女爲繼室筐篋萬
千行親迎禮酒荒日甚兵人窮日夜醺釀聲桓面如土噉
恨而已諸將裨稟問百不一應胡濬上書姜曰廣曰國中
擁精強百萬不出寸步日夜荒宴而眼穿外援濬非辭難
者故敢與相國訣自金氏入城剝富民誅鋤貞烈殆盡
劉天駟家鈔西山解體胡奇韋生致李鳳翔欲釋而金竟
斬之庚嶺以南腐心郭應銓兄弟不返吉安恨焉支解曾
應亨父子臨汝莫不齧齒王氏凡與楊萬同事者宿怨徧

四維矣且公以附金王而起者義乎不附者義乎古之杖
大義發大慮者如風馳霆擊敵不及拒今舉事數月而謀
未決使四方望斷境內菹醢此邦民庶何罪天下方亂強
者自立弱者困人夫戴舊主稱宗國此固忠臣豪士得志
之名實也今之巋然不與畔援爲伍獨陳九思孤軍五年
百戰彼前一收祁門旋還師候駕卒未嘗通尺素於二氏
其受命隆武者揭司馬傳詹事已厭見其所爲而去餘豺
鷂爲曹聞敵至各散保妻子金之心腹獨張啟祚起幕客
守郡宜圖得當以報而瑞州閒僻不能有所爲鄧雲龍以

五千歲議深號召烏合崎嶇武寧谿谷間其實盜耳以當
北兵如振落雖萬取何益且前者摧折義士稍有志識莫
不飲恨祝亾今徒假年號種怨自恣上無眞主而欲使氣
節之士爲金王出死力其誰聽之相國孤城耳注一帶閉
目不見太山豈知重圍之外所在白骨如丘陵環南昌附
郭百里村煙斷滅人之不存兵於何有相國無庸談義兵
爲也曰廣發書默然聲桓數來訊曰廣起義若何但日與
設約待援兵至宋奎光力請背城一戰憤悒欲獨帥麾下
出金王固止之斗米至六金有巡按御史詭名摩訶般若

入爲間事覺被磔并殺章于天解姜太保印更用全鳴時
都督內外軍務譚太以米二石使人呼於城下縋而餽之
聲桓報以冬笋百斤金橘一石百姓皆呼願從公侯出城
舍命一戰金王終不決薪盡撤屋以炊米至六百金一石
有反棧重戶枕數千金死者鳥鼠草本木實皆盡遂殺人
而食始猶擇人後乃父子夫婦相啖譚太閒暇分兵攻取
蜀郡西南逐張啟祚於瑯州北翦余應桂吳江於都昌西
北降鄧雲龍殺朱議深東收湖盜涂麒西破丁家塘土砦
餘什伯爲聚未成者林亮殷國楨亦次第擒散胡澹發憤

以爲二豎子不足惜而徒沮中原之氣病隔噎死其二子
被殺百姓爲

大清兵耳目牛酒瓜菜輸販日至然王氏火器多精利

大清兵攻城數爲所困全鳴時亦能軍善守禦故前後相持至
八閱月其冬李成棟出師救聲桓取南安進攻贛州與高
進庫戰不利退壁南康縣十二月堵胤錫督忠貞營李赤
心等分道援南昌至攸縣不進聲桓副將楊國柱私降己
丑正月十七日譚太以紅夷大礮攻城聲震山谷聞百餘
里亭午城破聲桓赴荷池死德仁突圍至德勝門兵塞不

能前三出三入當之者無不殊死與譚太馬首再相值不
識太擊殺數百人被執支解後二日得宋奎光於城西空
舍諭使降不食殺之陳方黃人龍死亂軍中餘諸將莫知
死狀者大率皆爲人所食也姜曰廣死僕家池兵皆降粵
西贈聲桓□□王謚壯武曰廣德仁贈謚有差初曰廣之
出也道過江上使人邀漢儒裔俱出辭曰三年不入國門
矣久無本朝冠服慙見長者何言曰必致之入謁故第媿
媿道舊叙一事不可斷如曩時日午客饑起辭去曰止願
有教也于今爲之當若何因復坐請問曰明之所以失天

下非左與闔耶金左襲而王闔支也公與侯安所受之哉
十日之間年號兩易名雖歸明實爲叛耳今擅除爵恣殺
人筦利權大更張若明有主不待命是僭也若其無隆武
永曆而如此爲之是僞也僭與僞春秋之所不予相國縱
與同事無後嫌後世謂相國何如人且兩家與事諸客一
以封拜一以歸明互相愚以成斯變而究也實爲兩家所
用年號甫更門跡已掃今且內相猜忌公能親於建武之
與豫國乎能則攬其兵柄退稱舊輔縞素待罪以告天下
令其慚而聽我竭心力爲之不濟則死不能則引身而退

歸耕浠水之陽無從叛亂居美名天道所忌也曰廣沈吟
無以答後在圍城徘徊日蹙追思其言而悔不用也自南
昌旣破何騰蛟李成棟同月敗死

論曰世傳聲桓當左夢庚時嘗對南都使者垂泣言吾慚
見諸君吾已爲賊固知非負恩者然誠聞八閩有主南合
楊萬西引騰蛟事尙可爲何至血軀三載多殺忠義西江
之禍于斯爲酷迨汰侈旣甚更因私忿假義旗坐困南昌
兵民糜爛名義事勢兩者俱悖其被夷滅豈得與死事者
同論哉

西南紀事卷十一

西南紀事

卷十一

書師武徐氏別

西南紀事卷十二

餘姚邵廷采念魯撰 邵武徐 榦小勿校刊

孫可望

孫可望字□□陝西延長人從張獻忠爲盜以驍忍助虐
獻忠僭號成都爲僞平東將軍順治二年乙酉獻忠思乘
李自成之敗北取陝西聽僞大學士汪兆齡謀盡殺蜀人
而行令可望及僞安西將軍李定國撫南將軍劉文秀定
北將軍艾能奇等分路四殺可望殺男五千九百八十八
萬女九千五百萬報功稱最蜀中千里絕煙火邑無居人

獻忠行至西充遇

大清兵中矢死王尙禮負其屍走追急棄之可望及兆齡猶率
僞文武東西鵠立忽萬馬突至塵掩中營方失措驚竄可
望等收餘眾數千家口萬餘由順慶南奔所至殺馬而食
馬盡食人尙日馳百餘里至渠河遇曾英兵千餘游徼能
奇出不意奮擊走之追至重慶江時可望將卒皆殘悸騎
不滿千弓刀脫落曾英意輕之盡移江中戰艦於南岸出
奇門南鄭坪望見賊眾各下馬偃臥知計已窮或勸英出
輕騎數千從下流襲賊大營而正兵渡擊賊當首尾不能

順縱不盡殲可使落膽去英不聽曰彼死命也急之彼傷
吾人第謹守南岸彼將飢死否自遠竄待其奔而擊之易
盡耳文秀望重慶車馬輻輳軍人縱飲市肆謂可望曰彼
易我而恃長江不設備可乘也且我軍絕粒旣十餘日與
餓死孰若一戰言訖卽手弓矢口銜利刃躍入江履水而
行徐湖等五人從之至朝天門忽溺不見南岸兵望見皆
大笑以爲自沈水死文秀等從水中斷鐵纜穴艙而入立
殺數人出不意盡爲文秀所殪投婦女輜重於江遂掠一
大舟而還可望等羅拜稱賀於是選壯士得百餘人披甲

執長矛鉤牌弓矢火藥登舟遶江上下衝突轉戰南岸兵
望風披靡曾英駕大舸數十繞圍可望於江心自持畫弓
立桅後爲王自奇射中洞胸墮水軍旣失帥遂大亂英兵
十萬頃刻瓦解賊眾盡渡入城縱殺自經獻忠殘破英所
招復戶口二十餘萬至是皆盡賊獲糧食衣物更復飽嬉
留數日燒夷重慶城屋望綦江而南所至殺掠如故十二
月廿七日在綦江眾無主欲散可望詐言獻忠婢老腳遺
腹生子與眾同盟輔孤於是乃相推可望稟其約束惟張
成功王十萬關索不附關索先遁收成功十萬榜之百八

十眾遂帖服而獻忠婢所生實女無後順治四年丁亥正月三日可望發碁江下令自今非接鬪不得殺人十日抵遵義守將王祥已走官民迎降入城秋毫無犯進至烏江黔撫范鏞總兵皮熊遣副將楊吉以三千人拒江守營南山文秀復沒而渡直抵南岸吉不戰而潰可望驅兵兩山伐木一夜成浮橋平明盡渡直奔貴陽熊聞烏江兵潰先走平越鏞走定番諸苗乘機入掠會城可望至又大掠三日始招安將犯粵西會石屏土司龍在田爲沙定洲所攻遣間使詣可望求援且告曰黔國公奔永昌已一年矣賊

圖楚雄急旦暮且下公行遲恐不逮事可望乃由威清平
壩疾趨雲南至曲靖遇前福州所遣太監孫興祖調沙兵
入衛方至可望謂興祖曰朝廷遠不知滇事始末今若徵
之是獎亂也不如討平沙逆迎還沐公使之引兵東向興
祖然之傳檄雲南可望等始去僞號復故姓稱明將軍皮
熊范鑛復入居貴州王祥亦復遵義夏四月可望至雲南
沙定洲自楚雄還戰大敗殺故大學士王錫衮宵走阿迷
可望入會城巡撫羅國禪宗室朱壽琳死之出示云爲黔
國討賊民間安堵無與遣使至永昌楚雄又執送阮嶺嘉

袁士弘至楊畏知軍前畏知未信滇人亦失意曰是除狼
得虎矣王祥皮熊各疏告行在今之入滇者皆張賊餘孽
名雖向正事豈革心朝廷無爲所愚瞿式耜聞而憂之可
望使李定國東追定洲拔阿迷定洲走保俾革竜而自與
劉文秀入迤西楊畏知迎戰被執可望解其縛坐之上座
約以其獎王室使作書通意天波遂同回楚雄西略大理
龍在田及許名臣來見諸土司多降附畏知乘間說以忠
義陳說邪正稱引古昔其部曲及定國文秀等傾耳聽獨
可望性陰鷲外雖唯唯內計兵強根本旣堅陰有自據之

志聞畏知論議更幸竊名義以附其欲八月可望入鶴慶
又分兵入麗江土知府木懿迎降沐天波得畏知書猶不
敢信遣其子忠顯入營曰願得守永昌足矣不敢復望故
位可望厚禮忠顯悉反所得沐氏世寶天波大喜過望可
望陰令文秀以二十騎隨其後名爲送忠顯文秀疾馳奪
瀾滄橋至永昌執天波及其子并鄉之宦者龔綏歸大理
聞劉廷標王運開死節事嘆異之召運開弟運閔於騰越
將官之運閔至怒躍入江水而死可望自號平東王謀稱
帝明年定國文秀進討俾革竜執沙定洲及其妻萬氏以

歸磔之悉定滇地前御史昆明任僕倡議尊可望爲國主
可望設六卿鑄興朝通寶錢以干支紀年令僕兼禮兵二
部尙書沐天波楊畏知憤甚其黨亦多不服已而艾能奇
死其將馮雙禮主營事可望籠之以術益兼兩部以事縛
定國教塲責百棍示威由是有隙可望患諸帥等夷難制
畏知申前說導以不若歸命粵西則人自稟畏順治六年
己丑四月因遣畏知以南金名馬入貢華慶龔爰爲副求
封親王辭頗驕悻兵科金堡首言異姓封王違制且觀可
望意不相下從之適足損威不可許大學士嚴起恆主堡

議久不決畏知謂時異勢殊法有因革且國家豈能禁可望自王耶今若不許阻遠人向化心又生一敵非計堵肩錫亦以爲言乃封可望爲定遼王賜名朝宗并賜定國名如靖文秀名若琦畏知未至陳邦傳以南甯與廣南接壤當先被兵欲自結可望使泗州城守將胡執恭先以書通約許封秦王可望悅執恭私鑄印填空敕拜表輒行至雲南可望郊迎受敕印俯仰甚恭所部皆賀土司修貢獻沐天波亦謙讓不敢以公爵釣敵可望大喜始奉桂王年號比畏知還知其詐深恥之卻不受厚遇執恭竟以秦王行

事諸軍悉曰行營護衛曰駕前軍自稱曰孤曰不穀文書
下行曰令旨上書曰啟稱定國文秀曰弟安西李弟撫南
劉爲張獻忠立廟歲時致祭皮熊在黔畏逼遣官李之華
通好請盟可望致書貴爵坐擁貔貅戰則可以摧堅守則
足資保障獨是不肖有司罔知邦本征派日繁黔中乃兵
出咽喉寧無救災卹鄰之念以爲假道長發之舉若黔若
滇總屬朝廷封疆惟欲與行在聲息相通何可有一毫私
意於其間若止以一盟了局爲燕雀處堂之計非不穀所
望於君子矣熊得書愈懼順治七年庚寅八月桂王在梧

州可望使復至求真封秦王大學士起恒持前議王化澄
朱天麟及本兵萬翱兵科徐極皆請許之文安之郭之奇
是起恒之奇因風變指明得失而籍川黔者希徇可望請
以通道西南起恒難之會內江楊鼎和至行朝力言王封
非是起恒引爲本兵又轉劉堯珍掌兵垣代翱極化澄天
麟議遂格可望由是切齒起恒九月可望犯貴州皮熊不
能禦走清浪可望使白文選追執之奪其兵黔中院司道
官會請文選入城遂下平越又使賀九儀將兵趨遵義王
祥棄軍挾妻子重貲將奔彭水眾盡散追及白刎死會

大清兵逼武沅馬進忠張先璧等避入貴州皆歸於可望眾至數十萬地與粵西相接其冬孔有德尙可喜破桂林廣州王奔南寧明年春遣編修劉蒞使貴州封可望爲冀王至平越不得入楊畏知請至行在更議可望陽諾先令賀九義張勝張明志以兵至南寧盜殺兵部尙書楊鼎和於崑崙關擊大學士嚴起恒於舟中投其屍劉堯珍吳霖張載述俱見害舉朝悸伏始眞封可望爲秦王畏知見逆節萌芽痛哭曰此乃我負國家入朝自劾遂留相王可望怒遣指揮鄭國就行在執畏知還黔殺之自是無一人敢齟齬

者文安侯馬吉翔司禮監龐天壽各輸誠於可望行在動定纖悉馳告陳邦傳叛導

大清兵逼南寧可望遣狄三品陳國能高文貴等遷王於安龍可望北取西川總督李乾德敗死李占春余大海下荊州降王自至安龍可望以兵守之范應旭知安龍府乘輿服御百官餼廩一切關白應旭應旭與提塘章應科造冊稱皇帝一員月支若干皇后一口月支若干而可望上書有云人或謂臣挾天子令諸侯不知彼時尚有諸侯諸侯亦尙知有天子今天子已不能自令臣更挾天子之令以令

於何地令於何人其恣肆類如此夏可望以吳三桂入四川白文選敗決意北舉慨然經略中原使李定國率兵八萬出武岡馮雙禮副之劉文秀率兵五萬出嘉定張先璧副之文秀入四川爲三桂所敗全軍俱沒而定國乘勝獨進克復桂林害孔有德斬陳邦傳九月定國北向衡州可望亦自至沅州使白文選張虎攻辰州拔之殺鎮守總兵徐勇自何騰蛟歿官軍久不至湖南可望定國一旦猝出故將胡一清趙應選馬寶曹志建等皆自山谷來歸民間亦多嘯聚以應長岳一帶俱奔潰十一月定國戰於衡州

害敬謹親王可望以定國數戰勝內忌馮雙禮與爭擄獲
益相構衡州之戰始嘗小卻將因以爲罪而殺之使召定
國於武岡定國覺其意辭不赴引兵從東安全州復入廣
西可望自帥兵追之不及有德雖死其固山佟圖賴復進
攻寶慶順治九年壬辰春與可望遇於花街子可望將中
軍馮雙禮軍左白文選軍右楊武馮萬寶在可望後

望見可望龍旗萃攻之殺傷相當可望忽自走入楊武
諸營見龍旗走俱潰惟雙禮一軍不動

鑒衡州之事不迫各引還以武寶問爲界遂棄湖南定

國攻肇慶亦不克時王在安龍幽閉日甚聞定國在廣西
與可望有隙密與太監張福祿全爲國言秦王待朕無人
臣禮朕欲撰一密敕齎西藩行營冀其出朕於險汝二人
辦得否福祿等涕泣受命以告大學士吳貞毓遂約內翰
蔣乾昌李元開給事張儁御史李順胡士瑞部郎徐極楊
鍾趙廣禹蔡紬鄭允元周允吉朱議昶朱東旦任斗墟易
士佳等與謀以吉翔天壽素附可望議先移天壽於外使
吉翔祭陵南寧皆出十一月乃密遣林青陽往廣西封定
國爲晉王命入衛尋遣周官申諭詞旨哀切定國受讀感

激泣數行下軍中皆流涕會劉議新自行營回過南寧爲
吉翔述其狀吉翔雖赴南寧留弟雄飛偵行在動靜乍聞
議新言大驚曰不早自爲地事發禍且及吾輩矣陰使提
塘王愛秀報可望又諷議新具疏安龍爲左驗可望聞之
大怒使人要執青陽官并吉翔赴貴陽對理陰厚待吉翔
順治十一年春可望使鄭國王愛秀至行在言西府負義
國主待渠不薄乃敢私通奸臣要脅封爵今林青陽周官
已考訊吐服皇上明知此事出自何人臣等可還報國主
桂王謝曰事非朝臣所爲比年外間假寶假敕甚多秦王

還宜密訪國等怒目而出至朝房見執政云我等欲回貴
州若輩作何語執繫貞毓又以兵入宮縛福祿爲國宮中
大震其黨兵侍郎冷孟鉅進曰諸臣不足惜上不亟自言
恐并及難桂王曰汝等逼朕朕知是誰汝等知之何不直
說悲憤而退貞毓備受楚毒曰我備員宰相凡事自主之
上下無與者然天壽雄飛已密探同事者姓名先報可望
竟偕執請王裁決所司以盜寶矯詔欺君誤國論罪福祿
爲國僞凌遲乾昌等十四人棄市貞毓賜自盡皆慷慨賦
詩投法以安王意安龍人哀之後爲祠祀稱十八先生焉

可望滋怨定國遣馮雙禮賀九義以騎兵七千步萬餘人
出古泥懷遠襲定國於柳州定國奔賓南追之不及遂攻
桂林無功而還可望仍厚養定國妻子於雲南其冬定國
圍新會兩月不拔與尙可喜耿繼茂等戰累敗由賓橫退
入南寧而王在安龍勢益蹙日食脫粟塗葦薄以居守將
承可望意更相凌逼挾彈射鳥直入宮門文吏乘輿呵殿
過之不復下改稱安龍府爲安籠莫敢致詰可望陰圖篡
逆患定國文秀異同故未發定國旣敗可望內喜是年可
望遣兵攻常德亦敗歸聞定國將赴安籠慮有變使白文

選率兵移駕貴州後宮皆哭文選亦爲泣下文選雖爲可望用然心不直可望因奏曰上無恐第遲行可望使文選追及曲靖文選遂不返至雲南劉文秀率文武官屬出迎王入居可望府封文秀爲蜀王與晉王定國同輔政託沐天波以心膺封文選鞏國公遣還黔召可望令以兵屬定國文秀經略川廣錢糧歸之行在可望以妻子在雲南未敢叛明年正月王復遣可望部將東昌侯張虎護可望妻子赴貴州又賜虎金簪一枝令從中開諭虎至詐言上賜簪密令行刺以媚激可望可望既得妻子無所忌遂大言

桂王負義定國文秀謀反奪文選鞏國公印并其兵置營中決意攻雲南馬惟興馬寶陰與文選謀乘機反正從容爲可望言文選舊人感宿恩諸將才望無出其右向特見脅定國使其心果貳必不復來人來而奪其兵失歸附心試用爲總統必能爲國盡力可望信之乃留馮雙禮守貴州而以文選爲征逆招討大將軍統諸將前行自帥大軍後繼九月兩軍遇於交水文選來歸可望聞變卽欲返貴州馬寶切齒大罵曰吾乃爲跋賊所欺要當手縛之生食其肉且豈因一人去廢大事耶文選爲賊時嘗戰傷足截

他人足接之雖愈而跛故寶嘗跛城可望又信之密使寶與張勝武大定以精兵四千由潯州間道襲滇都而身當定國悉眾出戰陣甫接惟興軍先走眾遂大潰可望夜奔貴州張勝至滇都沐天波恐王尙禮爲變挾與入朝以兵守之使王安等拒戰於城外勝知有備引還至渾水塘爲定國所執寶來歸文秀引兵東追馮雙禮誅可望曰官軍至矣可望知眾心散度事不濟遂挈妻子赴長沙經略洪承疇軍前降雙禮掩其輜重以貴州來歸可望至長沙爲畫取滇黔之策多爲書誘其部曲使內叛吳三桂竟拔雲

南可望固有力焉可望封義王傳子至孫降爲公